



Орган Лемковского Союза

Выходит в каждый четверг.

Редакция и администрация в Крыници. — Адрес „Лемко“ Крыница.

Господарче собранє.

В пятницу, дня 25. лютого отбыло ся собрание членов Союза Горских Земель, отдела краковского, посвячене справам турыстыкы и господарчого поднесения населеня, жиющего в горах.

На собраню высунено много постулятов в области сельского хозяйства, меже иншими постулят низкопроцентного и долго-терминного кредыту на будову выгодных помещень для живины на полянах с отвітным устройством гноевень.

Собрание посвятило много увагы навозам штучным. Навозы штучны сут основой горских хозяйств сельских. От часу, коли почали у нас по селах сїяти жужлі, положене села змінило ся на лучше, прибыло людям паши и статку и хлоп почал отрясати ся с біды. Пришла война и люде, не могучи купити навозов штучных попадали в чим раз больше биду и нужду. Тепер, правда, можна достати штучны навозы, але хлопа на них не стати, бо цїна их ест так высока, же ся не оплатат их куповати. Не змінят той правды факт, же в послїдних літах хлопы купуют чим-раз больше штучных навозов. Купуют, бо мусят куповати; их грунт уж так выяловил, же хочиячи вытягнути с него який нїбудь хосен, мусить ся купити навозы штучны аж и втотчас, коли они ся не оплачают, однак высока цїна штучных навозов стае ся причином дальшого задолженя селянства. Беручи тото все под розвагу собранє ухвалило звернутися до компетентных чинников о обнижене цїны штучных навозов и обнижене тарифы перевозовой при транспортах тых навозов желїзницами.

Не меньше важным справом для горских хозяйств ест справа рациональной годовлі рогатой живины и овец. Годовля овец не може ся добре розвивати, бо бракуе для них пасовиск. Властители прыватных лісов позвляют пасти в них овцы, не позвляють однак на тото заряды лісов камеральных. Прото туж высунено постулят звернути ся до міродетальных властей о позволене выпасаня овец в камеральных лісах втотчас, коли не шкодит тото лісной культурі.

В нашей закутині повстало в послїдних літах много садов, котры розвивають ся до-

бре. Гдеякы села уж и тепер продукують дуже овощей, котры продають на місци, або в поближких місточках. Овочы тоты продають хлопы сейчас в осени по цїнах низких, бо не мають их где переховати. Через тото мають они великы втраты, бо цїна яблук, ест в зимі два и три разы так высока як в осени. Втрат тых даст ся уникнути через побудоване по тых селах, где ест дуже садов помещеня до перехованя овощей. Крім того часть овощей планших дало бы ся переробити на повила, мармеляды, галареты, компоты и т. д. и в той цїли заходит потреба выбудованя, або урядженя фабрычки до переділки овощей. До овочевых переділок ест потребный цукор,

котрого теперешна цїна ест за высока. Собрание отже высуват постулят уділення низкопроцентных и долготерминных кредытов на переховальні овощей, и помещеня для их переділки, а также обниженя цїны цукру для цїлей переділки овощей.

Крім тых справ порушено также лісову господарку и домашный промысл сельский, котрый потребуе специальной опеки, не так при самых выробах, як при продажи выпро-дукованных предметов. Домашный промысл быват часто выкористаный страшно через посредников, котры закупуют товар за полдармо ище перед его выробленем. Собрание уважат за конечно потребне утворене кредытов для домашнего сельского промысла и утвореня кооператыва, котрый занял бы ся продажом выпродукованных предметов.

Плян будовы новых дорог.

Отдільну галузь дыскусии на собраню Союза Горских Земель заняла будова коммуникационной сїти битых и желїзных дорог в повіті новосандецком.

На перший плян высунено выкончене зачатой уж дороги, ведучой с Мушины, вздолж рікы Попрад через Жегестов и Пивничну до Нового Санча. Будова той дороги може быти выкончена ище в році 1938 коштом 400.000 злотых.

Другом важным дорогом ест дорога Пивнична — Шавница, котра лучила бы Шавницу с Пивничном, Жегестовом, Крыницом Высовом в повіті горлицком и Яблонком, бо одночасно высунено постулят будовы дороги Крыница — Высова. Дорога тота, як и дорога Мушина — Новый Санч мають перворядне значене господарче и турыстычне.

Важне значене господарче мае также дорога Новый Санч — Каменка — Королева — Богуша — Білцарева — Фльоринка. Дорога тота открье новы прекрасны терены для літників на трасі Королева — Білцарева и приближний тоты села с Новым Санчом.

Крім того заходит потреба будовы дороги Мушина — Лелюхов, а также будова желїзной дороги с Нового Санча до Шавницы.

С будовом новых дорог лучит ся безпосредно регуляция рік и потоков. Таковы потоки як в Жегестові, Білцареві и инши мусят бити зрегульованы в якнайкоршом часі, штобы вода не робила людям шкоды в грунті, хатах и дорогах.

Всі тоты дороги не даст ся побудовати в одном році. Роботы будут поступати постепенно, але всі высше наведены дороги сут обняты пляном коммуникационных сїтей и в недалгом часі будут побудованы. Буде также грунтовно поправлена дорога с Н. Санча до Крыницы, — с Грибова до Крыницы и с Крыницы до Тылича.

Папанин выратованный. Совітску наукову виправу на полночный бігун с проф. Папанином во главі посчастлило ся наконец выратовати. Спасли ю совітскы ледокол и летчики. Проф. Папанин прожил со своима товаришами 272 дней на ледовой крі. Опасность грозила им велика, бо ледовы горы, на котрых находила ся выправа, почали ся распадати. Встріча меже ученыма и их спасителями мала характер незвычайно сердечный. Самолеты, котры осіли на ледах, забрали участников выправы, штобы вывезти их на сушу.

Пренумерата в краю:

30 грошей місячно,
80 „ квартално,
1.50 „ полрочно,
3 зл. рочно.

В Америкі: 1 дол. рочно.

В Чехословакии:
2 кор. місячно, 10 кор. полрочно,
20 кор. рочно.

Цїны оголошень:

Цїла сторона 120 зл., ¹/₂ стороны 60 зл., ¹/₄ стороны 35 зл., ¹/₈ стор. 20 зл., ¹/₁₆ стор. 10 зл.; оголошеня малы за 1 мм. 20 гр., в тексті 30 гр., перед текстом 40 гр. При місячном и долгом оголошеню значна знижка.

Контото чекове Нр. 404.155.

Австрія на дорозі злучення с Німеччиною.

Под напором Гитлера в Австрии пришло до раптової зміни правительства. До нового правительства ввошли австрийські сторонники Гитлера. Во главі министерства внутрішніх справ, отже того министерства, котре регулює жите в цілої Австрії стоїть сьмпатик Гитлера Инкарт. Крім того три інші министерства обсаджено также сторонниками Гитлера.

Крім того нове правительство оголосило на желане Гитлера амнецією для політичних преступників. С вязниц вышли моральні і фактичні убийці канцлера Дольфуса, визначні предводителі і подвижники гитлеризма в Австрії.

Не подлежит сумнію, же в таких условиях Австрія буде опанована через народний соціалізм ведля рецепти Берліна. Независимость Австрії єст сильно захвіяна тым больше, же правительство австрийске мусит ся числити с Німеччиною в політиці внутрішній.

Килько видає світ на вооруженє.

Статистичне бюро при Лигі Народов обчислило, што на саме вооруженє видають всі державы світа оден мільярд швайцарських франков денно. Найбольше на вооруженє видають Совіты, бо 89 мільярдів рочно, друге місце занимає Німеччина, котра видає 78 мільярдів. Менше видає Італія (26 мільярдів), Англія (также 26 мільярдів), Франція (21 мільярдів) і т. д. Всі державы выдали в р. 1936. на вооруженє 355 мільярдів швайцарських франков. В році 1937 выдано на тоту ціль ище больше. В Німеччині 60 процент фабричных работников робит в военном промислі. Англія уважала однак, же видає за мало на вооруженє і перезначила на тоту

ціль 250 мільярдів франков. Буде чим людей убивати.

ной і заграничної. О зависимости свідчит уж факт, же новий австрийський міністер Инкарт выїхал до Берліна по інструкції. Славний в попередніх літах „Аншлюсс“ (злученє Австрії с Німеччиною) стає ся тепер актуальне. Оден его факт єст уж зроблений і буде основом факту другого, а именно: влученє Австрії, яко провінції великої Німеччини

Чом згодила ся на тото Австрія.

Австрія не хотіла згодити ся на предложенє Гитлера і оперла ся долго Гитлерови. Телефонувала о помоч до Італії, Франції і Англії, але жадна с тых держав не дала помочи Австрії. Минули уж тоты часы, коли Муссоліні выправлял на Бреннер своє войско в том часі, коли Гитлер хотіл завладіти Австрією. Тепер оба диктаторы жиють в згоді, звязаны пактами і договорами. Певно, же Італія не хотіла бы видіти барз сильной Німеччини, бо приязнь може ся скончити. Але тым разом Муссоліні уступил і то певно не за дармо. В недалгом часі почуєме знова о новых апетитах Італії і втотчас Німеччина згодит ся на тото і в разі потреби поддержит Італію. Франція і Англія не могли иначе поддержати Австрії, як лем в виді заохоты до опоры. Тото не выстарчило. Гитлер натискал. Австрія уступила.

Теперешне положенє єст сильно опасне для Чехословакиї. В Судетах жеє около 4 мільйоны німців. Гитлер напевно уїме ся за нима і буде старати ся прилучити их до Німеччини. Чи потрафит оборонити ся против Гитлерови Чехословакия, не знати, бо як маме примір на Австрії, приятелі в біді забывают о приязни.

Новый політичний процес в Совітах.

Дня 2. марта перед военном колегиом верховного суда ССРСР. зачал ся величезный процес політичний.

На лаві оскаржених засіли: Бухарин (редактор „Извѣстий“), Рыков (бывший міністер), Ягода (бывший міністер внутрішніх справ і начальник Г. П. У.), Крестинский (заступник Литвинова), Раковский (амбасадор в Парыжі), Розенгольц (міністер), Ивинов-Чернов (міністер), Гринко (міністер) і 12-ох інших визначных комуністов.

Всі сут оскаржены о шпйонство, дыверсію, террор, ослабленє армії, провокованє войны, стремленє до росорваня Совітов, знищеня соціалістичного порядку і приверненє капитализма і буржуйной власти, а гдеякы о струте Куйбышева, Менжинского і Горького.

Бухарин єст оскарженный также о замах на жите Ленина і Сталина ище в р. 1917.

Як видно с того оскарженя єст там всьо, што можна зашмарити політичным преступникам. За кажде с тых злочинів законы предвиджають кару смерти. Якаж кара може встрітити тых, котры пополнили всі такы страшны преступления?

В жовтні 1918 р. газеты называли большевиков шпйонами і зрадниками отчины, присланыма с запада в пльомбованых вагонах, тепер по 20-ох роках называт их так сам Сталин. Бо ктож то сут теперешны оскарженны? Сут то стары заслужены большевики —

сотрудники Ленина, котры разом с Ленином робили революцію і клали подвалины для Совітської Росії.

Бухарин был типовым теоритыком, человеком пера, котрого Ленин шановал і в важных справах користал с его рады. Он уложил теорию ленинизма, выдаючи „А. Б. В. коммунизма“. Книжку тоту долги роки уважали за библию большевизма. Был также одним с редакторов великой совітской энциклопедии.

Со Сталином Бухарин, як і други оскарженны не жил в згоді. Ленин остерігал старых большевиков перед хытрым грузином і его слова справдили ся. Сталин не любил Бухарина за его розум і высоке образование, котрого бракує Сталинови. Сталин боял ся все крытыкы Бухарина, як огня. Тепер помстил ся на нем.

Другий оскарженный Рыков належит также до передовых комуністов. Был он председателем рады народных комиссаров (премером) і першим совітским комиссаром справ внутрішніх. Ленин цінил его высоко і любил его за его жарты і остроты, котры Рыков уміл оповідати с барз поважном мином. Рыков скоро однак почал упадати, бо зачал пити. В послідных роках трудно было видіти его тверезым. Его именем названо навіть оден гатунок згорілки (Рыковка).

Третий оскарженный Раковский єст человеком нервным і порывистым, котрый на про-

цесі може сказати своим катам неодну прикру правду. Хоц в Совітах знають способы, штобы і с волка зробиты баранка.

Отдільну карту заслуг для большевизма має Ягода. Ой горка то была для многих ягода. Он яко начальник Г. П. У. перевел его реорганизацию і стал ся паном житя і смерти граждан Совітов. На его совісти тяжат сотні і тысячі людских жертв. Сам он здавал ся быти недосягальным і робил всьо, што ся ему подобало. Меже иншим занимал ся также вывозом дорогоцінностей і валюты за границу. Наконец попал і он в немилость і достал ся там, где высылал тысячі інших людей.

Инши оскаржены, то люде меньше знаны. С помеже давных засужених жеє лем оден Радек (жид). Має он тепер свідчити против своим компанам і приятелям. Же его свідочтво поможе им перенести ся на другой світ, можна быти певным, бо Радек захоче спасати свою голову.

Так виглядає свобода в Совітах. Люде гынут там як мухы, не знати за што. А если удає ся уникнути смерти кому, то лем хыбаль жидови Радкови.

Затискають пояс, а вооружають ся.

В теперешных тяжких повоенных часах здавало бы ся, што никому не в голові война, што никто ей не жадає і никто не допустит до ней. Тимчасом, коли читат ся о том, што робят поодынокы державы, приходит ся до переконаня, же каждая с них силит ся лем на тото, штобы мати якнайсильнішу армию і найлучше техничне вооруженє той армії.

Многы державы отказуют собі омасты і білого хліба, иншими словами, затискають пояс, лем бодай мати гроши на войско і всю тото, чого потребує войско до веденя войны. Щадят они, где лем могут. Нпр. Німеччина выдала зарядженє, штобы вырабляти сірники о 1 сантиметр коротши і через тото заощадити дерева. Вмісто чеколяды продають там цукор с ванилиом, штобы толщ с како, котре служит до продукції чеколяды, ошадити і змагазыновати на сличай войны. Колбасу робят там с крабов (морских раков) і через тото спроваджат ся меньше свиней до краю.

Але за то не жалуют там грошей на схоронища против самолетных бомб. Под землем в Берліні побудовано схоронища, котры могут помістити больше як мільйон людей. Через отвітну переробку пивниц і подземных магазинов, а также через будову новых схоронищ хоче німецка власть допрывадити до того, штобы всьо населенє Берліна могло ся схоронити перед неприятельскыма бомбами. Ідят отже німцы хліб чорный і скупомашченый, але за тото чимраз смілійше показують світу свой желізний пястук.

Нове щадниче зарядженє в Німеччині.

О теперешной Німеччині можна бы было сказати, же хотіла бы мати страх велику державу, але брюхы каже корчати чим раз больше. Свідчит о том также факт, який мал місце на собраню пекарей в Берліні. На собраню том мал промову проф. Виртц, котрий старал ся доказати, же пекары мусят печи хліб с муки чорной, змішаной с отрубамы. Бесідник подал яко причину той конечности факт, же Німеччина мусит робити запасы зерна.

Роботи в саді.

Март, то найотвітнійший місяць до упорядкованя саду. Селяне робят тото часами в осени. Але не всі роботи можна перевести в осени. Таке н. пр. обтинане галузок повинно быти зроблене лем на весну, бо, обрізуючи галузки, задає ся дереву раны, котры, выставлены на мороз, могут шкодити деревам. Таксамо білене пняков в осени ест непотребне и безцілеве. Всьо тото повинно ся робити аж на весну.

Передовсем повинно ся обрізати всі сухы галузи, а поломлены отрізати при зломленю. Также треба усунути галузки непотребны, котры загуцают дерево, або роснут в непожданом напрямі. Галузи обтинаме барз острым ножом, штобы не робити ран роздертых, бо такы гоят ся трудно. Если галузь ест груба, то отрізуемо ю огородовом пилком и погодивше выгладжае рану острым ножом. Раны повинно ся намастити садовничом мастю, под котром гоят ся скоро.

При перегляданю корон треба звертати увагу на всі опряды, постуляны листкы, купкы яичок и т. д., бо в них находят ся яичка, або гусеницы шкодливых для дерев овадов, котры на весну выряджают великы шкоды в садах, обжераючи листкы и квіткы, або псуючи самы овочи. Шкодники тоты треба нищити не лем на овочевых деревьях, але и на сусідных придорожных и лісовых деревьях, нпр. на живоплотах, котры сут часто розсадниками всяких шкодников. Такы опряды, стулены листкы и купкы треба старанно позберати до скриньчкы, або кошкы и спалити. При той случайности збереме также сухы листкы и сухы овочи, якы остали на деревьях и палиме, бо и они сут зборником шкодливых грибок, котри пак мечут ся на овочи и нищат их. Видиме нераз на яблоках ржавы, темны плямы, То всьо ест результатом оставляня на деревьях сухых листков и овочей.

Початок марта ест найотвітнійшом пором до біленя дерев вапном. Робиме тото в ціли забезпеченя дерев перед шкодливим діланем морозу. Практика выказала, же мороз шкодит деревьям не так в зимі, бо втотчас дерево находить ся в стані мертвом, а скорше под весну, коли день ест долший. Ходит о тото, же в грудні и січні день ест короткый, сонце світит и огріват слабо землю и дерева и дерева спят. В лютом, а особливо в марті, коли день ест долший, сонце нагріват сильнійше дерева, они зачинают оживати и пуцают соку.

Если в том часі потисне в ночи хоц бы и невеликый мороз, то може ся случити, же дерева вымерзнут. Штобы до того не допустити, добре ест побілити дерева, бо біла фарба не приймає лучей сонца, а отбиват их. Деревы в день не огрівают ся и не пуцают соков и тото хоронит их перед вымерзненем.

Добре ест также коло пняка дерева накласти снігу и удоптати его ногами, бо тото также вздержує пуцане соков.

Перед біленем треба пняк дерева оскребтати скрепачком, котру каждый може собі зробити с согненого куска обруча. Оден край обруча треба поостріти, бо тупом скрепачком не дуже даст ся зробити. В шпарах меже пападаным лубком ест маса яичок и живых овадов, котры хоронят ся там на зиму. Прото тыж не треба соскребаного лубка сохабяти на землі под деревом, але перед скребтанем розстелити плахту и по оскребтаню лубок спалити. Аж по старанном очищеню пней, треба дерева побілити вапном.

Хворота бандурок обнижат урожай.

Бандуры отгрывають важну ролю в кормленю живого инвентара. Особенно в таких роках, як минувший, где брак пашы дає ся людям сильно отчути, бандуркы одны спасают нераз хлопа от біды. Головно лем прото, же зародили ся бандуркы, селяне не шмарили ся в осени до масовой продажи своего статку. Понеже николи не можемо предвидіти, чи урожаєм инших паш буде добрий, чи планний, прото тым большу увагу повинны мы звернути на бандуркы, котры от долгих літ являют ся головным кормом людей и домашных звірят.

О обчисленя выходит, што в Польщі зберат ся с 26-ох гектаров тилько бандурок, як в Німеччині с 19-ох гектаров, помимо того, же на загал в Польщі сут ліпши грунты як в Німеччині.

Причина низкого урожаю лежить: 1) в слабом на загал и мало рациональном навоженю грунту, 2) в неувазі, штобы садити такы отміны бандурок, якы надают ся до даного грунту и 3) в незвертаню уваги на тото, чи засаджены бандуркы сут здоровы.

Як відомо бандуркы поддают ся ріжnym хворотам, як рак, пархы и т. д. Одны отміны

сут меньше, инши больше отпорны на тоты хвороты, а сут и такы котры не поддают ся цілковито тым хворотам. Найопаснійша с тых хворот ест **картофляный рак**, котрый, сильно розвинений, може знищити цілковито урожай бандурок. Ніг иншой рады, лем треба садити бандуркы отпорны на рака. Тото само относит ся и до инших хворот.

Прото тыж в интересі самых селян лежить, штобы перед роботами весняныма звідати ся в Окружных Т-вах Рольных, якы отміны бандурок садити и закупити ракоотпорны бандуркы. Выдаток ест невеликый, а користь може быти значна.

Парцеляция грунтов в р. 1938.

В „Дневнику Законовы с 15. лютого оголошено заряджене Рады Министров в справі парцеляции в р. 1938. державных грунтов и грунтов належачих до Державного Рольного Банку. В тарнопольском воеводстві мают розпарцельовати 10.000 гектаров, в станиславовском — 3.000 гектаров, а в лювском — 8.000 гектаров.

Кромі того роспарцельюют примусово великы маетки дворскы в цілой державі, а также маетки т. зв. „мертвой руки“, т. е. грунты належачи до приходств. В р. 1938 мают роспарцельовати в цілом краю 38.778 гектаров грунтов дворских.

В. Совітов заносит мертвота.

В варшавской газеті „Меч“ описує А. К. свои враження с над большевицкой границы. Граница на Волини, то пару метров широка смуга землі, заросла травом и буряном. По обох сторонах той смугы стоят рідко два ряды граничных столбов: червено-білы польскы и червены совітскы. Зараз за том смугом тянут ся поля. По совітской стороні в отроженню от нашой, тягне ся монотонна мертва пустыня. Смутну картину дополняют сіры темны будынкы (граничны стражницы). Много сел, котры до недавна лежали близко самой границы — тепер счезли. Знищено аж и дерева, штобы нич не засланыло терену. Лем ту и там на горбку видно сіры бараки, загороду с колючого дроту и масывны молотильні с мотором. Але тото всьо, так бараки як и молотильня выгладат мертве, застыгле, бо не оживлят землі штоденне сельске жите.

Якы лікы для звірят треба мати в хаті.

Против здутя.

1) Амоняк (1 ложка на кварту воды для коней, а 2 ложки на кварту воды для волов и коров) вливати при здутю по кварті на годину, можна давати пару раз што годину. Амоняком добре ест также натерати статкам столчены місца, опухлину, а также при кольках. Купує ся в аптеці.

2) Вапняна вода, (2 ложки гашеного вапна на кварту воды) вливати здутой корові по кварті што годину, разом 2—3 кварталы. Вапняна вода повинна быти на каждом сельском господарстві. Больше количество вапняной воды робит ся так: згасити фунт вапна літном водом, пак доляти ище 7 кварт воды и добре вымішати. По 24 годинах переливаме воду до иншой посуды так, штобы не было осаду и до того плыну додаеме ище раз 8 кварт воды и мішае. Так зроблену вапняну воду зливаме до фляшок. Она помагат также на раны, столченя, скаліченя и отмороженя. Але головно уживае ю при здутю. Там, где статок пасе ся на мочарах, повинно ся давати раз на тыждень по кварті вапняной воды также здоровым статкам, штобы охоронити статок перед розмягченем костей.

До гоиня чистых и ропных ран.

Креолина (до промываня — 2 ложки креолины на кварту воды), **йодоформ** (до засыпованя), **йодына** (до смазованя) **галун** (до засыпованя).

На пархы и лишай у коней и коров.

Креолина, змішана с омастом (со смальцом, або с вазелином) втерат ся.

На чиракы.

Штобы чирак скорше лопнул, натерат ся его **йодином**. Вытігат ропу с чирака **дияхель**. При золзах у коней и при стверднілых выменях у коров, смаує ся **сіром (шаром) мастю**.

На глисты и хробакы.

помагат **еметык**, або **терпентынова олива**. Дає ся натцо с отваром лену, коням 5 ложек, коровам 10. Терпентынова олива помагат также при кольках (натерати брюх) при кашлю и запаленю ключей (натерати груди) при пораженю заду (натерати хырбет) и при охваті (натерати ноги).

Што чути в світі і в краю

Кырвава забава в Лодзи. Родительський кружок організував при одній школі в Лодзі забаву з танцями, на котру прийшло около 500 люда.

Около години 4-ой над раном помеже двома п'яними учасниками забави прийшло до звади, котра скоро змінилася в битку. Одному і другому поспішили з поміччю приятелі і битка прибрала в скором часі масові розміри. Авантюра перенесла ся на двор і поблизи незабудовані поля. Пущено в рух залізні друкы, ножи і револьвери.

Конец битці положил сильний отряд поліції, котрий окружил поле сраження і задержал всіх присутних.

В поміщеню было 450 людей, в том числі 189 жінок. Недалеко школи найдено трупа 24-літнього Генрыка Турка, а недалеко него лежал Ст. Мурованський з перерізаным брюхом, а пару кроков дальше Брон. Цосвинський з перекототыма грудьми. Стан их ест барз тяжкий. Крім того 27 учасників забави ест покаліченых і потолченых. В школі найдено парусот порожных бутельок от згорілки, а по кутах масу пошмаряных ножей, багнетов, кавалков заліза і т. д. Видно, же на забаву приходили люде вооружены.

Школу здемольовано. Шибы выбито, поламано лавкы і школы. Полиция арестовала 27 людей, серед них сут всі члены родительского комитета. Школа ест замкнена.

От, до чого провадит пиятыка.

Самоубийство двох сестер. На приходстві в Сельцах коло Станиславова пополнили самоубийство дві сестри София і Меляния Джерджовин, дочки емеритованого дыректора гимназии в Станиславові. Обі сестри приіхали трагичного дня до своего діда греко-кат. священника о. Петра Янкевича і заявили ему, же хотят у него загостити долший час. Вечером были совсем веселы і пошли спати до отдільной комнат, где приказали подати собі дві миски теплої воды. Рано коли обі сестры не выходили долго со своей комнаты, выважено двери і найдено их обі неживы с перерізаныма жилами на руках і с перерізаныма горлами.

Діло их о. Янкевич на вид неживых внучок сомліл і попал в тяжку нервову хвороту.

Причина смерти двох молодых дівчат ест незнана.

Нечуваний злочин в костелі в Любоню. Дня 27. лютого в костелі в Любоню коло Познана пополнино нечуваний злочин. В часі, отправки богослужения был убитый священник ксьондз Станислав Штрейх.

О год. 10. рано по службі Божой ксьондз Штрейх хотіл выголосити проповідь і звернул свои крокы ку казальниці. Нагло пал стріл і ксьондз, трафлений кульом в голову, упал мертвый на подлогу. Стрілял якийси мужчина с отдаления пару кроков. На преступника шмарил ся костельный, але бандит стрілил также до него три разы, задаючи ему тяжкы раны в голову і рамено. На бандыта шмарила ся тепер школьна молодеж. Бандыт стрілил ище раз і ранил одного школяра в ногу і пак выскочил на казальницу і крикнул:

Най жиє комуна.

Користаючи с замішаня преступник вырвал ся с костела і почал утікати. Хопил го однак на дорозі оден мужчина і отдал в руки поліції.

Населене было тым поступком так огор-

чене, же шмарило ся на преступника і хотіло его роздерти. Лем с трудом удало ся поліції выдерти го с рук людей.

Потворным убийцом ест 48-літний Лаврентий Новак, от недавна замешкал он в Любоню і был знаний со своих комунистичных переконань.

Страшний том злочин выкликал в цілой окрестности велике вражене. Вість о убийстві дошла того самого дня до Познана, где отслужено за душу погыбшого панихиды.

Костел в Любоню, в котром пролято кров, замкнено, бо мусит ся его ведля приписов каноничных на ново посвятити.

Арестовано брата Троцкого. Як доносит „Курска Правда“ в Димитриевску жил брат Троцкого, котрый крыл ся под назвиском Бронштейн. Агенты Г. П. У. открыли его, арестовали і вывезли до Москви.

Практика домашнього господарства. В Німеччині выдано заряджене, же каждая дівчина до 25 літ мусит через оден рок учити ся домашнього господарства в чужой хаті, штобы погодивше уміла вести власне домашне господарство.

Лем в выключных разях дівчата могут учити ся господарства от своих матерей. Можетото мати місце леш втотчас, коли родичи мают ище понад четверо дітей в віці понизше 14 літ.

Закрите женских гимназии в Німеччині. Німецке министерство просвіти выдало заряджене, штобы закрыти всі женскы гимназии. Результатом того зарядження буде, же дівчата не будут кончити гимназии, а тым самым будут мати закрытый вступ на университет і не будут обнимати посад, перезначеных для мужчин. Женщины ведля идеологии Гитлера мают занимати ся выхованем дітей, варенем і веденем домашнього господарства.

Помер сын Троцкого. В парыском шпиталі помер по операции в таинственных обстоятельствах сын Троцкого Седов. Кружат поголоскы, же смерть Седова послідовала через интрыгы врагов Троцкого. Приятелі Троцкого зажадали от французских властей секции тіла, штобы переконати ся, чи Седова не отрули. Подозрівають, же могли тото зроби́ти агенты Г. П. У., бо Седов — то сын Троцкого, а Троцкий — то зайый враг Сталина.

Прокажены сами вертают до шпиталю. С табора прокаженных в Тикилештах в Румунии утекло перед якывсу часом 120-ох хворых

на проказу. Глядано их долгый час безрезультатно. В послідном часі зголосило ся до заведения 18-ох хворых, просячих о принате на ново. Што до решты збіжавших ніт нияких вистей.

Велике наводнене при устю Дуная. В результаті ростопленых снігов і дожджей выляла в застрашающий спосіб ріка Дунай при устю до Чорного Моря.

Вода заляла цілковито місто Волков. Под водом нашло ся 1.020 хат. Находяче ся по другой стране Дуная село Переправа была цілковито затоплена в продолженю одной ночи так, же населене с трудом лем потрафило ся схоронити на дахах і деревах. Вода подмыла фундаменты домов і от того завалило ся 49 хат.

Рогач забил наганяча. На ловах в Люстроно нагонка полошила олені, штобы выгнати их на стрільцов. В том часі оден великий олень, розлощеный криком, шмарил ся на наганяча, пробил его на сквозь і пак стратовав ногами так, жо покаль прибіжали другы хлоппы, наганяч уж не жил.

Кельтивна і кырвава згода. Амерьканскы республики: Сан Доминго і Гайти вели меже собом долги граничны споры, котры повстали перед роком. В граничных борбах было убитых понад 7 тысяч граждан республики Сан Доминго.

Тепер прийшло до угоды меже обома державами і республика Гайти выплатила отшкодоване в сумі 705 тысяч долларов і прирекла укарати виноватых і подати их назвиска по выкрытю.

Куплю

„РУСКЕ ПАЛОМНИЧЕСТВО”

составлене Алексием Булка со Скварявы выдане в Коломыи в р. 1906.

Писати до Админ. „ЛЕМКА”, Крыница 2.

МОЛОДЫЙ с добром практыком организатор-инструктор хора церковного і світского добрый режисер, руководитель культурно-просвітительного жита читальні глядат занятия. Условиа по договору.

Адрес: Крыжановский Михаил, Бобрка почта Лобозев, пов. Леско.

Комунальна Каса Ощадности Повіта Краковського в Кракові

Рок основаня 1882.

ЦЕНТРАЛЯ КРАКОВ, УЛ. ПИЯРСКА 1.

тел. 115-97, 131-73, 101-03.

Отділення: КРЫНИЦА, тел. 112.

ВЕЛИЧКА, тел. 6.

Всі порученя входячи в область банковости.

ПОРУЧЕНЯ ДЕВИЗОВЫ
ПОРУЧЕНЯ БИРЖОВЫ
СХОВОК АВТОМАТ.

СУМА ВКЛАДОВ ПОНАД 35.000.000 ЗЛ.
МАЕТОК ВЛАСНЫЙ ОКОЛО 6.000.000 ЗЛ.

БЕЗОПАСНОСТЬ.

ДОБРЫЙ ПРОЦЕНТ.